

BOLA SEPAK – Kejohanan Bola Sepak Institusi Teknikal Sabah

UMS juara dengan rekod tanpa kalah

KOTA KINABALU: Universiti Malaysia Sabah (UMS) muncul juara kejohanan Bola Sepak Institusi Teknikal Sabah setelah menewaskan 1-0 ke atas pasukan tuan rumah pada perlawanan akhir yang berlangsung di Politeknik Kota Kinabalu (PKK) baru-baru ini.

UMS selaku pasukan jempunan memulakan persaingan dengan langkah kanan apabila menundukkan Politeknik Sandakan (PSS) dengan jaringan 3-0. Kemenangan itu kemudiannya diteruskan lagi ketika menentang pasukan Institut Kemahiran Mara (IKM) apabila UMS dengan kemenangan tipis 1-0 sebelum memelasah pasukan Institut Kemahiran Belia Negara (IKBN) dengan jaringan 4-0.

Pada perlawanan antara UMS dan PKK pula dipenuhi dengan aksi mendebarkan apabila kedua-dua pasukan saling berbalas serangan. Namun pada separuh masa kedua, UMS mengubah corak permainan dan berjaya mengawal keseluruhan permainan dengan mengasak kubu pertahanan dan melakukan beberapa percubaan merbahaya ke gawang lawan.

Gol kemenangan hadir pada penghujung separuh masa kedua apabila pemain gantian Andi Habbibi Ambo menolak masuk bola yang dihantar hasil sepakan sudut yang diambil oleh Memet Kaya sekaligus menewaskan penjaga gol PKK dan mengangkat UMS sebagai juara bagi kejohanan tersebut.

PKK yang tewas terpaksa berpuas hati sebagai naib juara manakala tempat ketiga jatuh ke tangan pasukan PSS. Pasukan IKBN dan IKM pula masing-masing berada di tempat keempat dan kelima.

Dalam pada itu, Ketua Jurulatih pasukan UMS David Johnny berpuas hati dengan mutu persembahan yang dipamerkan oleh anak didiknya sepanjang kejohanan



Pasukan UMS

tersebut.

Beliau berkata, kejohanan itu merupakan persiapan Pasukan Bola Sepak UMS dalam kejohanan Liga Bola Sepak Institusi Pengajian Tinggi Borneo yang akan berakhir pada pertengahan bulan Jun ini.

Pada kejohanan itu, pasukan UMS membuktikan keunggulannya apabila menjuarai kejohanan tersebut dengan mencatat kemenangan dalam semua perlawanan tanpa sebarang bolos.